

REVISTA SITUASAUN – JULU 2017

ASUNTU NE'EBÉ PRESIZA TAU ATENSAUN

- ▶ **Insidente violénsia 128 Akontese iha fulan Jullu no Rejista Númeru Aas iha Postu Administrativu Balun;**
- ▶ **Insidente Violénsia 48 Liga ho Eleisaun Parlamentár 2017, Maske Eleisaun Konsidera La'ó ho Dame;**
- ▶ **Insidente violénsia Liga ba Grupu Arte Marsiál (GAM) Tun Kompara ho Númeru Average (rata-rata).**

INSIDENTE VIOLÉNSIA 128 AKONTESE IHA JULLU NO REJISTA NÚMERU AAS IHA POSTU ADMINISTRATIVU BALUN

Iha fulan Jullu, Sistema Atensaun no Responde Sedu (AtReS) rekolla insidente violénsia hamutuk 128 no husi númeru ne'e insidente 37 akontese iha Dili. Númeru insidente 128 ne'e mós konsidera tun uitoan kompara ho númeru average (*rata-rata*) husi fulan Outubru 2016 to'o Juñu 2017 ho insidente 132.6 kada fulan. Dadus hatudu katak:

- Insidente violénsia iha Jullu kuaze 50% envolve ema ho idade entre tinan 25-34 no 44% husi grupu ne'e mós sai vítima;
- Insidente 4 envolve feto mak hahú halo violénsia, no insidente 14 feto mak sai hanesan vítima.

Insidente iha Jullu mós konsidera tun kompara ho númeru average (*rata-rata*) tanba liga mós ho esforsu balun hanesan:

- Servisu másima husi PNTL no F-FDTL durante tempu kampaña no eleisaun parlamentár ne'ebé halo patrullamentu maxima tebes;
- Insidente tun mós tanba pasa revista liga ho implementasaun Lei No. 5/2017 kona-ba Regime Jurídiku Relativu ba Prátika Arte Marsiál, Arte Ritual, Armas Brancas no Rama Ambon ne'ebé kontinua la'ó nafatin;
- Kompromisu lider polítiku ne'ebé asina paktu dame no maneja militante sira ho di'ak no mós kolaborasaun comunidade hotu iha prosesu eleitorál.

Maske númeru insidente violénsia tun iha Jullu maibé iha postu administrativu balun hatudu númeru insidente aas hanesan: Postu Administrativu Baukau hamutuk insidente 14 ne'ebé konsidera sa'e maka'as kompara ho nia average 8.1 kada fulan. Husi insidente 14 ne'e, iha insidente 10 liga ho eleisaun parlamentár; iha postu administrativu seluk hanesan iha Postu Administrativu Laga rejista insidente 7, aas liu kompara ho nia average 1.6 kada fulan; iha Postu Administrativu Oesilo insidente 8 kompara ho average 2.1 kada fulan no iha Postu Administrativu Remexio iha insidente 5 kompara ho average 1.6 kada fulan.

Totál Insidente Violénsia iha Jullu 2017	
Munisipiu	Insidente
Aileu	5
Ainaru	7
Baukau	23
Bobonaru	5
Covalima	4
Dili	37
Ermera	8
Lautein	10
Likisá	5
Manatutu	5
Manufahi	3
Oekusi	12
Vikeké	4
Totál	128

INSIDENTE VIOLÉNSIA 48 LIGA HO ELEISAUN PARLAMENTÁR 2017, MASKE ELEISAUN KONSIDERA LA'O HO DAME


Iha fulan Jullu, Sistema AtReS rekolla insidente violénsia hamutuk 48 liga ho festa demokrasia iha periodu eleisaun parlamentár 2017. Númeru ne'e la dun diferente ho númeru insidente violénsia ne'ebé akontese iha eleisaun prezidensiál ho total insidente 41 no ne'e signifika eleisaun la'ó ho dame no hakmatek. Maske nune'e, insidente ne'ebé rejista iha loron eleisaun 22 Jullu hamutuk insidente 22, númeru ne'e konsidera aas kompara ho loron baibain. Dadus mós rejistu insidente 15 ne'ebé mosu tanba la komprende prosesu eleisaun ho klaru no iha insidente 23 mak envolve militante partidu polítiku sira. Insidente hirak ne'e mosu tanba provoka malu ho liafuan, asaltu fíziku, tuda ho fatuk, baku malu, les pamfletu, sunu no estraga atributu partidu nian. Insidente balun mosu tanba la komprende ho di'ak regra kampaña no eleisaun ne'e rasik. Insidente liga ho eleisaun parlamentár barak liu akontese iha Munisipiu Baukau hamutuk 12 no Dili hamutuk 11, enkuantu insidente 7 akontese iha Munisipiu Lautein; Iha Aileu, Bobonaru, Oekusi no Vikeké ida-idak akontese insidente 3; iha Likisá akontese dala 2; iha Ainaru, Ermera, Manufahi no Manatutu ida-idak akontese insidente 1.

INSIDENTE VIOLÉNSIA LIGA BA GRUPU ARTE MARSIAL (GAM) TUN KOMPARE HO NÚMERU AVERAGE (RATA-RATA)

Sistema AtReS iha fulan Jullu rekolla insidente violénsia hamutuk 6 liga ho Grupu Arte Marsiál (GAM). Númeru ne'e konsidera tun kompara ho númeru average (*rata-rata*) husi Outubru 2016 to'o Juñu 2017 ho insidente 8.4 kada fulan. Maske nune'e, númeru sa'e maka'as iha fulan Abril, ho total insidente 13, tun fali iha Maiu ho insidente 2 de'it, sa'e fali ba 3 iha Juñu no sa'e tan ba 7 iha Jullu. Insidente liga ba GAM ne'e akontese dala 6 iha Munisipiu Baukau hanesan: Iha Laga, Suku Tequenomata, Aldeia Kaikasalari akontese dala 4 liga mós ho problema disputa rai ba hela fatin, akontese dala 2 iha Vemassee, Suku Uato-lari, Aldeia Naulale tanba odi vingansa no akontese dala 1 iha Munisipiu Lautein, Suku Parlamentu, Aldeia Moro tanba problema namorada depois da'et fali ba GAM.

DADUS ANNUAL

Tuir dadus monitorizasaun, husi insidente violénsia 128 ne'ebé akontese iha fulan Jullu 2017 hatudu katak, númeru insidente tun uitoan kompara ho númeru *rata-rata* ho insidente 132.6 kada fulan maske sa'e uitoan kompara ho fulan kotuk. Númeru ne'e hatudu katak, iha mudansa boot ba situasaun seguransa iha tempu eleisaun tanba iha eleisaun parlamentár 2007 no 2012, hatudu númeru insidente violénsia aas no kauza ema balun mate iha tempu kampaña no tempu anunsia rezultadu eleisaun.



PREVENSAUN NO RESPONDE BA KONFLITU

Atividade Prevenção de Conflito Ne'ebé implementa hosi Sistema Atensaun no Responde Sedu (AtReS)

- Iha loron 21 Jullu 2017, Belun liu hosi Sistema AtReS halo publikasaun ba ALERTA kona-ba insidente violénsia eleitorál ne'ebé akontese iha tempu kampaña eleisaun parlamentár. Alerta ne'e publika hodi toma atensaun másimu ba situasaun segurança iha tempu eleisaun parlamentár 22 Jullu 2017;
- Hodi prepara ba servisu observaun eleisaun parlamentár iha 22 Jullu 2017, observadór hosi Komisaun Europeia hasoru malu ho Koordinadór Belun iha Munisipiu Manatutu hamutuk ho Monitorizadór Belun hosi Postu Administrativu Manatutu Villa. Soru-mutu ne'e hodi fahe informasaun ba malu liga ba kampaña eleitorál no preparasaun Belun nia atu halo monitorizasaun ba eleisaun parlamentár 2017.



Atividade Prevenção de Conflito Ne'ebé Hala'o Hosi Ekipa Programa Apoio Polisiamentu Komunitária (PAPK)

- Belun liu hosi Programa Apoio Polisiamentu Komunitária (PAPK) realiza formasaun hodi estabelese no jere programa polisiamentu komunitária iha Postu Administrativu Fatuberliu, Munisipiu Manufahi hodi prevene no responde ba Violénsia Hasoru Feto no Labarik, hasa'e koñesimentu kona-ba Polisiamentu Komunitária no knaar Konsellu Polisiamentu Komunitária.

Atividade Responde ba Konflitu Ne'ebé Hala'o Hosi Ekipa Klínika Asesu ba Justisa

- Belun liu hosi Programa Mediasaun no Rezolusaun Disputa (MRD) ho projetu klínika asesu ba justisa parseria ho UNDP no Defensoría Públika Judisiál Covalima fasilita

treinamentu alternativu rezolusaun Disputa ba Xefe Suku no Membru Konsellu Suku sira hosi Suku 5 iha Postu Administrativu Same, Munisipiu Manufahi;

- Ekipa Klínika Asesu ba Justisa fasilita mediasaun ba disputante na'in tolu ne'ebé hakesuk malu ho Kompañia ida kona-ba direitu Traballadór sira nian. Mediasaun ne'e realiza tanba hakarak ajuda disputante sira buka solusaun ba sira nia problema liu hosi negosiasaun. Mediasaun ne'e realiza liu hosi servisu hamutuk ho Ofisiál Defensoría Públika na'in 2 iha Sala Mediasaun Edifísiu Klínika Asesu ba Justisa iha Defensoría Públika Munisipiu Covalima.

DEZENVOLVEMENTU POLÍTICA

- Belun hetan konvite hosi Komisaun Europeia no Membru Parlamentu Komisaun Europeia hodi halo diskusaun saida mak Belun hetan iha terrenu liga ba lala'ok eleisaun parlamentár 2017. Ko'alia mós rekomendasaun balun hosi observaun Belun nian iha terrenu hodi hadi'ak liu tan prosesu eleisaun nasional iha Timor Leste iha tempu oin mai. Enkontru ne'e hala'o iha Hotel Timor iha loron 23 Jullu 2017. Partisipa mós representa organizaun Igreja katólíka, OIPAS;
- Belun partisipa enkontru ho Observadór internasionál hosi Uniaun Europeia liga ba Eleisaun Parlamentár. Observadór Uniaun Europeia halo soru-mutu ne'e iha Hotel Timor iha loron 28 Jullu 2017 liu ba hodi bolu organizaun sira ne'e halo observaun ba Eleisaun Parlamentár 2017, hodi diskute kona-ba rekomendasaun iha relatóriu atu hadi'a di'ak liu ba eleisaun sira iha futuro.



KONA-BA REVISTA NE'E

Revista situasaun ne'e relata kona-ba asuntu xave relasiona ho insidente violénsia no tendénsia konflitu hosi koleasaun dados monitorizasaun liuhosi Sistema Atensaun no Responde Sedu (AtReS), ne'ebé kobre iha Postu Administrativu 43, hosi Postu Administrativu 65, Suku 275 iha Timor-Leste durante fulan Jullu 2017. Belun esforsu atu fahe informasaun ne'ebé up-to-date no serteza ho dados atuál. Hanoin katak, bele hetan mudansa situasaun ho lalais hosi kontribuisaun dame ita hotu nian. Ami agradese no simu informasaun seluk ne'ebé bele klarifika ka update dados, liuhosi sistema AtReS.

Informasaun kle'an liu>> www.atres.belun.tl

- Márlia Oliveira da Costa**, Jestor Sistema AtReS: bylah.belun@gmail.com
- Laurensius Lein**, Especialista Prevenção de Conflito & Política: laurensius.belun@gmail.com